



# NOVINARI I (LI) IZVRŠIOCI ZADATAKA

- Javni mediji su u funkciji zaštite krupnog kriminala, ističe Bosić
- Vjerujemo našim izvorima, jer su u svim ranijim slučajevima imali tačne informacije, napominje Džepina

Objavljivanje informacije da je predsjednik SDS-a Mladen Bosić od **SIPA** dobio dokumentaciju vezanu za način na koji je predsjednik RS-a i lider SNSD-a Milorad Dodik 2007. godine dobio kredit od Pavlović banke za kupovinu vile na beogradskom Dedinju, agenciju Srna dovelo je u žižu javnosti.

## Milionske pljačke

Reagujući na ovu vijest, Bosić je najavio tužbu zbog, kako je naveo, laži koje je emitovala novinska agencija Srna: "Novinska agencija Srna ponovo se našla u ulozi saučesnika kriminalne hobotnice u RS-u, plasirajući laži u svom servisu. Jedna od posljednjih laži je vijest da je **SIPA** meni dostavila dokumentaciju o kreditu koji je Milorad Dodik digao kod Pavlović banke godinu nakon što je kupio vilu na Dedinju", kazao je Bosić.

Ustvrdio je da se "ovim nastavlja korištenje javnih medija Srne i RTRS-a u funkciji zaštite krupnog kriminala u RS-u i plasiranje laži protiv svih koji ukazuju na dokaze o pljačkama milionskih razmjera".

Na odgovor iz Srne nije se dugo čekalo. Kolegij te agencije ocijenio je izjave predsjednika SDS-a napadom na slobodu medija, te najavio da će o svemu obavijestiti misiju OSCE-a u BiH. No, cijela priča nije stala na tome. Nakon reagovanja kolegija Srne, na društvenim mrežama pojavilo se nepotpisano pismo novinara te agencije, u kojem su ustvrdili da postoje politički pritisci i uplivi na njihov rad, koji im onemogućavaju da profesionalno obavljaju svoj posao.

"Mi, novinari Srne, ograđujemo se od zločinačkog udruženja koje

je kidnapovalo Srnu i od nje napravilo kanalizacioni otvor za izlivanje produkata kreatora zla svake vrste, formalno i neformalno okupljenih oko Pere Simića i sličnih likova koji pokušavaju da unište svaki oblik slobodnog razmišljanja u Srni i uopšte kontrolišu javno mnijenje. Iako se to svuda i uvijek u istoriji pokazalo kao uzaludan posao, od toga, nažalost, ne odustaju glavni i odgovorni urednik Milica Džepina, njena zamjenica Tatjana Parađina, njihov pomoćnik Saša Krsman i urednik specijalnog servisa Nenad Tadić. Uništavaju i posljednji gram kredibiliteta agencije nepoznavanjem i nepoštovanjem osnovnih normi novinarskog posla, a time i Republike Srpske i naroda kome treba da služe. Umjesto javnosti, služe maloj grupi ljudi, koja ih je tu dovela da izvršavaju zadatke, a ne da budu novinari, zaklanjajući se iza 'slobode govora', navedeno je u pismu.

U izjavi za Oslobođenje glavna urednica Srne Milica Džepina kazala je da je ta agencija bila sigurna u validnost sporne informacije, jer "da nije bilo tako, ona ne bi bila ni objavljena".

- Bilo koji političar može da priča šta hoće, pa i predsjednik SDS-a Mladen Bosić, ali mi vjerujemo našim izvorima, jer su u svim ranijim slučajevima imali tačne informacije, navela je Džepina.

## Teške kvalifikacije

Istakla je da je ovaj slučaj nametnuo i pitanje "etiketiranja Srne od Mladena Bosića zbog njegove izjave da se Srna ponovo našla u ulozi saučesnika kriminalne hobotnice u RS-u.

- Da li javnost smatra da Bosić ili bilo ko drugi ima pravo da iznosi ovako teške kvalifikacije i

na taj način vrši pritisak na rad Srne, upitala je Džepina.

Komentarišući pismo novinara iz te agencije, kazala je da iza toga stoje oni "koji već godinama pokušavaju da dođu na rukovodeća mjesta u Srni", te da je riječ o grupi od najviše pet zaposlenih koji su nezadovoljni svojim statusom.

- Dokaz ove tvrdnje su ovakva pisma koja su se uvijek pojavljivala kada su u Srni bila ili su najavljivana imenovanja na rukovodećim pozicijama, ustvrdila je Džepina.

Svi pokušaji da dobijemo komentar samih novinara Srne o ovom slučaju ostali su bezuspješni. Zanimljivo je pritom da oni s kojima smo razgovarali tvrde da "čak nisu ni znali za cijeli ovaj slučaj".

**G. KATANA**



## Demanti iz **SIPA**

“Povodom neistinitih tvrdnji pojedinih medija i pojedinaca da je Državna agencija za istrage i zaštitu (**SIPA**) nakon pretresa Pavlović banke pojedincima ustupala privremeno oduzetu dokumentaciju, osjećamo potrebu da kao respektabilna institucija u BiH zaštitimo ugled Agencije, koji se narušava iznošenjem neistina na račun njenog rada”, poručili su jučer iz **SIPA**.

- S ciljem objektivnog i istinitog informisanja, obavještavamo javnost da Agencija postupa isključivo u skladu sa zakonom i to po zakonitim naredbama Tužilaštva i Suda BiH, te kategorički odbijamo neistinite navode na račun rada Agencije. Dakle, Državna agencija za istrage i zaštitu sve informacije i dokumentaciju pribavljenu provođenjem svojih zakonskih nadležnosti, uz odgovarajuće izvještaje, dostavlja Sudu i Tužilaštvu u skladu sa zakonom, podsjetili su iz **SIPA**.



Mladen Bosić najvio tužbu



**Džepina:** Političari mogu pričati šta hoće